

Тарихи-мәдени кешен бой көтермек

Бұрнағы күні аймақ басшысы Ерлан Арын бастаған, құрамында ҚР Парламенті Сенатының депутаттары - Ғарифолла Есім, Ермек Жұмабаев пен Асхат Күзеков бар ел азаматтары Баянауыл ауданында және Екібастұз ауылдық аймағында болды. Өз сапарларында Мәшһүр Жүсіп Көпейұлының және Ақкөл-Жайылмадағы Исабек ишан кесенелеріне зиярат етіп, ұлылардың аруағына дұға бағыштады.

Зиялы топ алдымен Ескелді топырағындағы ұлтымыздың ірі ойшыл-философы Мәшһүр Жүсіп Көпейұлының кесенесіне ат басын тіреді. - Кереку-Баян

Әкілді киелі далаға ырыс пен ереке дарытқан - оның халқы. Сол халықты ұйытып, ынтымаққа тәрбиелеген ұлы көсемдер, дарынды тұлғалар мен киелі әулиелер еді. Халық әркез осындай даналарының көмегіне жүгінген. Сондықтан, Мәшһүр Жүсіп секілді әулиелердің мазарына тәу ету - біздің халықтығымызға, тәуелсіздігімізге бас июмен тең. Егер осындай дәстүрлеріміз ұмыт болса, еліміздің болашағы баянды болады деу қиын. Мұны Елбасымыз Нұрсұлтан Назарбаев та үнемі айтады. Қазіргі кезде ғұламаның мұра-еңбектерін зерттеумен айналысып жүрмін. Амаңдық болса, алдағы уақытта

алған әсерім жайлы жұртшылықпен бөлісе жатармын. Керекуге сапарымның бір мақсаты - халық ауыз әдебиетінің насихаттаушысы, ұлыстар мен рулардың шежіресін жинақтаушы ғұламаның кесенесіне келіп, ел ақсақалдары және азаматтармен кездесу, ой-пікір бөлісу болып табылады, - деді сенатор Ғ.Есім.

Естеріңізде болса, Мәшһүр Жүсіп Көпейұлының сәулетті кесенесі 2006 жылы бой көтерді. Содан бері ғимарат-күрделі жөндеуден өтіп, айналасында

ДЕРЕК ПЕН ДӘЙЕК

■ Мемлекеттік «Мәдени мұра» бағдарламасы жүзеге асқаннан бері, яғни 2004-2011 жылдар аралығында елімізде 93 тарихи және мәдени ескерткіш жөндеуден өтті. Сондай-ақ, шетелдердің мұрағаттарынан халқымыздың бұған дейін белгісіз болып келген тарихы, этнографиясы мен өнеріне қатысты 5 мыңға жуық қолжазбалар мен баспа басылымдары табылып, сатып әкелінді.

көріктендіру жұмыстары жүргізілген еді. Мәшһүр Жүсіп мұражайының ғылыми қызметкері әрі кесене шырақшысы Өсет Пазыловтың айтуынша, қасиетті атаның аруағына тағзым етушілер саны артауда.

Қазіргі кезде мәшһүртану ғылымына деген көзқарас өзгеріп, жұрт руханиятқа бет бұра бастады. Жұртшылық бұл жерге әулие атамыздың рухына дұға бағыштау үшін келеді. Бірақ, олардың көбі ғұламаның кім екенінен, еліне қандай қызмет атқарып, ұрпаққа нендей мұра қалдырғанынан бейхабар.

Аймақ басшысы Ерлан Арын Мәшһүр Жүсіптің өмірі мен шығармашылығын халық арасында насихаттауды дамыту мақсатында Ескелдіде заманауи тарихи-мәдени кешеннің құрылысын бастау жоспарланғанын айтты. Бұл кешеннің құрамына ақынның мұражайы, кітапханасы және зиярат етушілерге арналған қонақүй кіретін болады.

Мәшһүр Жүсіп мазарына тағзым ете келгендер атаның аруағына арнап дұға бағыштады. Елдің тыныштығын, халықтың берекелі болуын тіледі.

Тарихи-мәдени кешен бой көтермек

« Басы 1-бетте

Бұдан соң игі жақсылар Ақкөл-Жайылмаға барып, ондағы Исабек ишан хазіреттің былтыр бой көтерген кесенесіне тәу етті. «Өлі разы болмай, тірі байымайды» деген қанатты сөз бар. Кезінде ислам дінін дәріптеп, жастарды имандылыққа, адамгершілікке баулып, елге үлгі бола білген қасиетті бабаларды еске алып, Құран бағыштау - ұрпақ парызы. Сондай жандардың бірі - Исабек ишан хазірет. Бүгінде ел арасында құрметті тұлға жайлы естеліктер мен аңыз өңгімелер аз айтылмайды.


- Бұрынғы заманда мектеп, оқу деген болмады. Сол кезде Исабек ишан, басқа да қасиетті тұлғалар жастардың діни сауатын ашып, олардың бойына адамзатқа тән асыл қасиеттерді дарытуға мол үлес қосқан. Сол үшін біз осындай ұлы әулиелерге басымызды иіп, тағзым етуге міндеттіміз, - дейді ҚР Парламенті Сенатының депутаты Ғарифолла Есім.

Исабек ишан хазіреттің кесенесіне келген жамағат оның аруағына дұға бағыштап, адами қасиеті жайлы естеліктерімен бөлісті.

Ақкөлдік тұрғындардың айтуынша, исламның асыл мұраларын насихаттап, жұртты Алла бір, Құран хақ, Мұхаммед Алланың елшісі екеніне сенуге үгіттеген Исабек ишанның басына келушілер қатары жылдан-жылға көбеюде екен.

- Былтыр демеушілердің көмегімен Исабек ишанның кесенесі салынған болатын. Ел сыйлаған әулиеге деген құрмет мұнымен ғана шектелмейді. Алдағы уақытта Исабек ишанның сүйегі жерленген Ақкөл өңіріне рухани мәдениет кешені салынады деп жоспарлануда. «Әулие бабамыз жерленген киелі өлкені гүлдендіру керек. Келешекте осында ишандар туралы мол деректер жинап, тәу етушілерге арнап асхана салу мәселесін қарастырамыз», - деді облыс әкімі Ерлан Мұхтарұлы.

Қазіргі таңда аталған жерде екі үлкен мәселе бар. Олар - жол мәселесі және жайылма судың тапшылығы. Тұрғындармен кездескен аймақ басшысы жақында 100 млн. текше метр су жіберілгенін, алдағы уақытта жолды



Суретті түсірген Т.Нұрғазы.

жөндеу мәселесі қолға алынатынын жеткізді.

Ақсақалдар жақсы істің жаршысы болып жүрген ел азаматтарына алғыс айтып, ақ баталарын берді.

Әсемгүл ҚАБДУАХИТ,

Баянауыл ауданы.

Нұржайна ШОДЫР,

Екібастұз ауылдық аймағы.